

萬 有 文 庫

第二集七種

王 雲 五 主 編

升 菴 全 集

(二)

楊 慎 著

商 務 印 書 館 發 行

升菴全集

(二)

楊慎著

國學基本叢書

鎮徐

中華民國二十六年三月初版

著作者

楊

慎

發行人

王
上海河南路
雲
五

印刷所

商
上海河南路
務
印書館

發行所

商
上海及各埠
務
印書館

王雲五主編
萬有文庫
第二集七種
升菴全集
八冊

(本書校對者 龍旭光 徐鼎銘 潘其旋
劉培慧 周蓋侯)

升菴全集十一卷

青城五隱贊

范公英英。炎漢挺生。韜華金德。潛光玉恆。讓王媲美。洗耳偕清。漸達鴻羽。孚陰鶴鳴。

右范長生

天授韜奇。入林結茨。鳳兮翩翩。麟之儀儀。年百廿歲。有嬰孺姿。山壚淵槁。奚可同之。

右譙定

岷山逸老。藏用隱賢。執范寂袂。拍薛昌肩。高吟弄月。長嘯揭天。遺蹤何在。白沙瓊田。

右勾台符

白雲先生。六詔不起。乃如蒲芝。聯德敵體。孟光同曜。柳妻遺誅。有婦人焉。五人而已。

右張俞妻曰蒲芝

臨利不敢先人。見義不敢後身。諒無補於事業。要不負乎君親。遭逢太平。以處安邊。歌詠擊壤。以終餘年。天之顧畀。厚矣篤矣。吾之涯分。止矣足矣。困而亨。冲而盈。寵爲辱。平爲福者邪。

右自贊

昆明鄺尹陞萬州守歌幃詞

瓊瑤南溟。帝稱奇甸。銅符左篆。天假德星。既妙簡於鴻恩。宜特申於燕賀。恭惟某官。丹山瑞族。赤水名駒。

南嶽陶嶺之奇英。北斗尙書之家世。箕裘軒冕。合有聞人。衣鉢文章。克紹前烈。難兄難弟。麟儀儀而鳳師。大馮小馮。印纍纍而綬若若。緬茲昆明望邑。寔惟滇雲具瞻。牛鼎烹鷄。置器固難於適用。蟻封試馬。未久已見於非常。宰號神明。政成卓異。生明作肅。百務不留。治劇劇煩。一訊如響。扼武夫之吭。而奪之氣。攝豪右之膽。而服其心。衆謂空谷足音。人擬中臺首召。京洛雲山外。方佇來儀。乾坤日夜浮。暫勞坐鎮。搏風以上。眷然瀟湘之故人。遵海而南。行矣澄清之岳牧。殊方倚玉。逆旅斷金。魯擊柝之聞。邾幸邇仁里。楚餘波之及晉。久庇德隣。翠羽未張。幡駢已駕。何以報之青玉案。庸假填詞。我姑酌彼黃金壺。聊申雅餞。昆明春水盈盈渡。咫尺又銷魂路。金馬碧鷄遺愛處。臥轍攀轅。留綦解珮。望望仙塵去。○鵬海鯨波天一柱。統統鼓聲催欲曙。金紫重來還肯許。帝加三錫。民歌五錫。早沛清時雨。

亭衡陟明歌障詞

巫岫鍾靈。巴月遙輝。葉澤吳興。婉嫵滇雲。迥化蘋洲。岳牧詞人。名流堪讚。循良君子。信史宜書。恭惟雲南大邦伯。鶴峯柳先生。神峯瑤峻。學海珠澄。夙蜚曄花溫瑩之聲。早膺藥榜。蘭臺之選。雲端首郡。天微名區。襟帶出同。咽喉庸濮。控南詔西垂之險。先東洱北勝之雄。

帝謂殊藩。人推奧府。官當方面。任切股肱。咻民于懷。協留老蔚。宗之譴。東吏若濕。笑成璫宗資之謠。鹿逐熊以隨輻。馬如羊而却廐。清崇藥節。威服卉裳。鈴閣晝閑。地有春臺之樂。銛階星間。家無夜戶之虞。芻茲雨塊風條。兩岐興漁陽之詠。猶彼苗螟葉蟊。三秀繼宣房之歌。政成不待三年。歸猶就水。德流已匪一日。速比置郵。亭衡屆期。陟明行觀。蝸巖鮐叟。曷形容于舞之蹈之。鳳驛蛟衢。難挽留于攀者送者。假麗藻以

展采揚聲芳于聲詩調歸朝歡爲祖道贈

秋盡汀洲蘋未歇掩映荻花相向折一枝好贈朝天人還如鵲樓前雪瓊凹連玉凸五城邊銀爲宮闕
埤聲寒非烟叢裡卿藹瑞雲纈○五馬驕嘶虬漏徹靱靜珮鳴鶴籛列朱衣引隊奏彤幃天言清問堯階
切俞音傳袞驚賜金增秩千旄子把勳名昭回青簡身如稷如契

賀薛曲泉撫臺旌獎帳詞

寇恂再借敷青陽百舍之春黃霸重臨沾靈河九里之潤政首支郡績最中臺民瘼下蘇譽命上逮恭惟
某官政賜也達守夷之清治所臨而有聲課每上而輒最處煩不擾在劇能剋勞以身先風行草偃雷在
天上雲行雨施消周雅之蘊蟲斥岑瑜之泥鶴七戒三齋旣禱千倉萬寶可期況才識疏通兼政事練達
佐郡而譽望洽暑瀟而廢墜興上上之考特旌元元之論允協慎也卜茲榆社實庇棠陰徐孺子下榻於
陳蕃旣輝蓬蓽陸敬輿傾蓋於姜輔實仰帡幪居邦事大夫之賢猥從臾趨之後原田聽輿人之頌敢爲
燕賀之先

青陽有脚喜五馬重臨江陽城郭南定雲開西岷波靜簾捲風清幕早魃化爲甘雨露禱不須泥鶴兆萬
寶詠千箱四野豐年如約○斟酌曾見說老手劇郡利器無盤錯犬吠花村魚遊春水桴鼓長閒卻佇聞
考績薇垣復報薦名荷橐計晨夕鶯遷燕賀金明紫渥

右調喜爲遷

送薛曲泉之鎮雄勘夷手卷詞名拍

澄清德水。天開龍馬之湖。洋溢恩波。春滿魚鳧之國。在民崑而堪誦。叶公論以無踰。緬惟馬湖少邦伯曲。泉薛公。潮水奇才。鄞城甲族。鈞河擲洛。擬竹箭之顓資。騰茂蜚英。呈天球之秘寶。升從赤縣。出守朱方。西陵有召父杜母之謠。南巴分九里八鴻之潤。自公覆露。蒞茲江陽。在昔歌廉。薄言觀葢月之仁政。于今借寇。奚必分刺史之眞符。北山賢勞。欲息踴躍用兵之策。東臺板命。須仗填寬。迥駕之行。昂昂千里駒。笑鄙夫畏首畏尾。蔚蔚九變豹。俾小人革而革心。惠我無私。式遄其歸。是祝。贈公不拜。未占有孚。則然。聊申蚬竅下里之歌。用代驪駒在門之什。

借寇歌。廉春有脚。皂蓋朱轡。輝映江陽郭。一睨清泉斟且酌。候人無事閒鈴閣。○瘴域嵐方勞鎖鑰。靜析沉鋒。虎兕成鸞鶴。風颭歸旌詩滿囊。休遲竹馬兒童約。

右調鳳棲梧

孝烈婦唐貴梅傳

烈婦姓唐氏。名貴梅。池州貴池人也。笄年適朱姓。夫貧且弱。有老姑悍且淫。少與徽州一富商有私。宏治中。富商復至池。一見婦。悅之。自拊心曰。吾無頭風。何以老嫗虛拘哉。乃密以金帛賂其姑。姑利其有。誨婦淫者。以百端弗聽。迫之弗聽。加以箠楚。弗聽。繼以炮烙。體無完膚。終不聽。乃以不孝訟于官。通判絃谿毛玉亦受商之賂。倍加官刑。幾死者數。商猶慕其色。冀其改節。復令姑保出之。親黨咸勸其吐實。婦曰。若然。全吾名而污吾姑。非孝也。乃夕易桂襦。雉經於後園古梅樹下。及旦。姑不知之也。將入其室。挺之手持桑杖。且罵且行。曰。惡奴早從我言。又得金帛。且享懽樂。今定何如。而自苦乎。入室無見。尋之至樹下。乃知其

死。姑大慟哭之。親黨咻之曰。生既以不孝訟之。死乃稱嫗心。何哭之慟。姑曰。婦在。吾猶有望。婦死。商人必倒賊。吾哭金帛。不哭此惡奴也。尸懸於樹三日。顏如生。樵夫牧兒。咸爲墮淚。每歲梅月之下。隱隱見其形冉冉而沒。有司以礙于府官之故。終不舉。余舅氏喻士積薄遊至池州。稔聞其事。作詩吊之。歸屬愼爲傳其事。嗚呼。婦生不辰。遭此悍姑。生以梅爲名。死于梅之株。冰操霜清。梅乎何殊。既孝且烈。汗青宜書。有司失職。咄哉可吁。乃爲作傳以附露筋碑之附。

倉庚傳

梁武帝代齊錄。居齊宮。後庭稚齒。在潘余之亞者。損之又損。尚溢乎百數。郗后心妒焉。帝閒居。一日覽大荒經云。倉庚食之。令人不妬。遂下令虞人收捕此鳥。絡野籠山。佛首爭獻者盈軒墀。乃勅中庖以爲宮膳。旦旦不繼他肉。后與帝食而甘之。帝心冀其術之速驗。試問后曰。此餘甘可以分諸夫人乎。后即輟箸不食。帝曰。荒經曷予欺乎。其諸食力尙淺耶。將盡脯其餘。倉庚中有老而慧者。鼓抵作人語而稱曰。余西裔之羽臣也。余祖逮事庖義氏。庖義氏之佐有鳥鳴者。主建福是釐百羽。命余祖曰。而仁鳥也。其司春候。繇茲以還。奕世載育。及周文王邑於岐山。西申有鳳鳥者。覽其德而下之。羣鳥皆往從之。萃於岐下。維時風翔者。露翥者。雨舞者。霜鳴者。朝嘲者。夜嘯者。以萬計。復有巴人之比翼。蜀山之文翰。方山之孔鳥。善芳不味。翡翠華首。咸集宮樹。王及後宮不之奇也。而余族獨著彤管焉。其詩曰。維葉萋萋。黃鳥于飛。爲其有助於德象也。二號警戲。引弓飛土而逐之。后曰。非所以養童心也。戒勿彈。周公白文王。命羅氏境內特貰不捕焉。今帝不欲爲文王。則已。欲爲文王。盍赦微軀。帝曰。爾曷知周文王。試爲我言文王后妃之德如何。庚

乃喜而躍曰。驚知之。驚知之。匪后妃之德。實文王之烈。日者天之明。月者地之紀。夫爲妻綱。象日明。使婦從夫。放月紀。日載魄於西。由媵以升。嫡。月載魄於東。由嫡以逮媵。帝笑曰。禮失乃求諸烏乎。爲我說之。庚引脰曰。驚何知。驚何知。月之朝也。君以視朔。不近內焉。后亦辟焉。月始魄。左媵六人迭御三夕。象微陰也。月成魄。右媵六人迭御三夕。象漸陰也。月成弦三夕。而世婦迭御焉。月成采三夕。而御妻迭御焉。月之幾望。后當一夕。陰將盈也。月之端望。后當一夕。陰極盈也。月之后望。后當一夕。陰不終盈也。自是三夕仍降。而御妻三夕薦降。而世婦三夕還降。而左媵三夕復降。而右媵及月之夕也。君以掩身不近內焉。后亦辟焉。象月以進。象月以退。授銀環告進也。正金環告退也。施玄的告辟也。鳴佩玉告節也。由媵以升。嫡本微而著盛。由嫡以逮媵。自盛以下微。勿使陰厭陽。勿使柔乘剛。嗣續以昌。壽命以長。此陰禮教六宮而頌聲洋溢萬方也。又公此制於天下。諸侯有副宮。大夫有側室。士有妾。當夕侍夜。傲是爲節。當此時。豈伊無險陂王制。鰥之妬亦何能爲。周制之蕪久矣。而欲委罪於微禽。變性於纖羽。不亦異乎。且荒經之誕。非神農之述也。帝而信之。是不知也。沉昵之專。非周文之制也。帝而行之。是不仁也。負此二愆。不可以君羽族。而況君江東乎。帝聞庚言。憊然側席。郗后聞之。慨然無色。乃命寫其言于斧扈。行其制于永巷。郗后幡然。更爲逮下之行。庚之力也。帝喜曰。徒信古陳編。不如倉庚言。乃放之不殺。封爲金陵郡公。唐世有號金衣公子者。卽其後也。

樂湘辭有序

楚衡余氏尙賓給諫。別號樂湘子。通顯矣。湘之樂弗忘也。乃引病寧歸。其友人楊愼擬楚聲招之。

楓林遙倚兮湘之流。蒙寵鬱葱兮靈源幽。浦漱沼徭兮道逶迤。清冷淥淨兮波淪漪。文鯤起兮翔鵬浮。盼
睽楓林兮且遨遊。美人樂兮無期。芳杜生兮猗猗。遲莫兮不自獻。甘淵瀟兮澈澈。蕩兮涵。水環屈。臨瀕洞
兮還洄洑。紆兮鬱思兮淑蛟螭窟。鼓枯查兮誰和曲。西交夏浦兮東顧瀍須。吞陽吐陰兮涵霽浴虛。陽候
是宅兮川后攸都。飄風爲信兮零雨爲驅。玄景霏霏兮翳翳。冽冽兮淒淒。依臆兮狎鷗。回汀兮隱洲。盼睽
楓林兮且遨遊。鶴子唳兮援侶嘯。回鴈鳴兮慕其儔。美人兮歸來。湘中兮不可以久遊。

無悶篇有序

余也疾。疾悶困之日久矣。吊影獨坐。有冰壺承子來自成都。惠然過我。鳳靖亭上。清談相對。積日
彌旬。又見鶴池方池草池三余之名藻。欣若誦之。不知沉痾之去體也。遂作無悶篇以贈承子云。
易積而難撥者。惟悶而已矣。況孤臣之謫九年。懿親之隔千里。始心折而骨驚。漸形茹而神縈。商商玄壺。
遲遲華晷。夢糾魄而升魂。竊撫膺而鳴指。梁高孫原。境窮漢鉛。地則邪龍分浦。水則岡象交川。酒旗之星
有衣。篋篋之天無椽。樹交紆兮嵐靄。峰含齡兮瘴煙。二豎不逢。九嬰相纏。消渴非長卿之病。寂寞異子雲
之玄。折楊咲兮逝其遠。散花念兮久矣捐。晉賢空悲蒲柳質。鮑令徒傷松栢篇。悶有結兮誰斷。悶有塵兮
難潛。坐囚山兮鎖愁城。違樂郊兮去驩館。智者不我顧。室邇而迹遐。佳人不在茲。庭虛兮情滿。若有人兮
號冰壺。駟斑麟兮乘青鳧。手攜玄峯之綠帙。來自芙蓉之錦都。攜十洲之瓊藻。聯三池之瑤璣。問岑兮
叩宋。同折菱兮焚枯。金爲膏兮玉爲醴。霞爲漿兮雪爲腴。是日也。震滌九陽。霽霽四嶂。出蕭森。臨昭曠。翼
竹颺。披柳浪。沉痾旣失。幽悒亦暢。冰壺子起而爲留仙之吟曰。有矯者龍兮。鸞鵠蜚蜚。子有成言兮。今我

無違。升彼珥之琦。聊與子忘機。無庸歸兮。余乃應之曰。於菟三無愠。潛龍兩無悶。戢卿良箴。余心有開。子文子淵。伊何人哉。

思美人二章寄夏舜俞

渺淮海兮維揚。思美人兮增傷。鵬何爲兮去息。龍何爲兮潛藏。松有心兮不改。蘭無人兮彌芳。秉中情兮欲寄。非柔翰兮能將。

又

渺淮海兮揚州。思美人兮增愁。鰲魚龍兮日夜。遭鴻鴈兮春秋。阻波濤兮浩浩。望牛斗兮悠悠。我所思兮。昭悵君胡爲兮淹留。

升菴全集十二卷

古樂府

沅江曲

綠蘿山豁午煙開。野阪山樵競往回。疊浪高潭渾不畏。銅鑪船上唱歌來。
碧天霜冷月明多。平澧風交湘水波。夜夜楓林驚客棹。村村銅鼓和蠻歌。

羅甸曲 六首 貴州道中

百里馳驅倦。三更夢魂歸。不辭晝夜苦。但使逢春暉。

其二

山圍羅甸國。水繞的澄橋。橋下東流水。可惜無蘭橈。

其三

寒燈闕孤館。陰雲鎖重城。長夜恆思曉。久雨恆思晴。

其四

登山千尋梯。下阪九仞井。雨潤衣珠融。風吹髮毛冷。

其五

蠻樹不凋葉。蠻雲不放晴。長亭望不見。何處是渣城。

其六

林間山胡鳥。聲聲啼我前。何似故園裏。花亭聞杜鵑。

關嶺曲四首貴州

倦枕愁鷄鳴。問郎今日程。中路不可宿。長途須早行。

其二

北登鷄公背。南望象鼻阮。相逢試相問。往來定誰難。

其三

關索嶺四十三盤高。前有安龍菁。行人莫辭勞。

其四

老鴉關仰樹間。靈卜西去何當還。

蜻蛉謠

蜻蛉美姜公也。公未蒞止。西郊不聞平息。浹年公在斯矣。聆輿誦。采民謠。綴茲風耳而目之。乃知美非溢也。

蜻蛉川。礪礪野。鉄菁窮崖。飛鳥不下。魑結成羣行。白日腥風灑。繫我鰲牛驅笮馬。金鷄廟前無行者。使君坐紫城。枹鼓臥不鳴。蒼山平。洱水清。守犬無夜驚。行商達天明。白羽蠶。青苗生。南山踏歌北山耕。願留使君住。只愁使君去。畏途前番君不聞。高車駟馬亦使君。劫商車下般車輪。

新春始泛歌二首

螳螂川水青如苔。漕溪寺花紅滿臺。韶光滿眼莫惜醉。幾箇扁舟乘興來。白沙渡口幾人家。紅粉當壚青旆斜。梁上新巢早留燕。門前垂柳暗藏鴉。

滇海竹枝詞

羅漢孤峯祇樹林。梁王輦道海中心。海垠青青堪牧馬。海眼只今無處尋。

東浦彩虹懸水碓。西山白雨點寒江。烟中艇子搖兩槳。空裏鷺鷥飛一雙。

滇人喚虹
鷺爲水碓

悲酸行

少日多懽。老境足悲酸。悲酸一何易。懽一何難。遊子久不歸。憔悴羈南冠。親庭隔千里。夢中路漫漫。年來轉漂泊。居處無恆安。征馬常苦瘦。旅席常苦寒。有客過我門。勸我強加餐。春陽正發育。覆載本自寬。窮途謝好音。白意于青翰。

蒙鳩篇

辭家鄉去親愛。遠從軍萬里外。日暮曠野。霜風凍我。有夫行側。營巢寄所。蒙鳩語老鷗。摘巢捫去之。老鷗言此鳥是鳳凰。捫之恐不祥。但可嚇去之。不令在我傍。鳳止鳳飛。羽毛摧頽。五里一返顧。十里一徘徊。山川嵯峨。嶽岑隱阿。且飲晨露。殫朝霞。禍無常門。福無常家。咄嗟呼傷哉。謂之何。

青蛉行二首寄內

青蛉絕寒怨離居。金鴈橋頭幾歲除。易求海上瓊枝樹。難得閨中錦字書。

燕子伯勞相對眠。牽牛織女別經年。珊瑚寶樹生海底。明星白石在天邊。

張云予點升菴詩不喜其深邃而喜其朗爽也

遙夜吟

遙夜吟。懷禺山也。會阻乎期。情見乎辭。

明發葉榆城。暝逗蘭津渡。超忽類飛翰。往來如織路。僕痛馬亦黃。簪短帶復長。天高行誰問。日暮坐自傷。鴻飛畏逢羅。虎飢正出柙。寒流泚玄冠。涼風吹白帟。子有負俗累。予乃投荒人。睽形而比影。異習仍同塵。晤言能幾朝。契闊還疊夕。浪跡苦難并。嘉會良易擲。翻憶在滇海。翻思在連然。耀歌花館醉。梵梵雲房眠。丹癸耿遙夜。烏臼聒五曉。相望不可晨。咫尺限雲杪。

舞姬脫鞋歌題畫

潘妃睡起冷金沙。弓鞋半脫雙鸞斜。越羅襪襯齊紈素。彩霞搖裔香生步。早路金蕖白日娥。芝田洛浦凌微波。曳霜回雪下平地。琉璃滑澤春雲膩。花鬆玉軟嬌無力。天公一笑生春色。寶蘭困倚殢蹉跎。小玉雙成扶不得。起來翹翠踏芳塵。粧臺搗鏡重梳勻。人間絕世誰相并。月鈎下闌。綳綳新。

南中曉寒曲

南中異節候。北陸戒裘鎧。夜凍玉樸邀。朝寒金畢逋。可念無衣客。誰徵裘與襦。

龍編行答禺山

北極軍書一羽過。南交氛祲九真多。金潏銅柱天王地。象渚龍編瘴海波。渭曲屯田愁葛亮。關中餽餉急蕭何。嵐開比景鷺低水。風度鳴沙馬歎陀。自許將軍回白日。誰憑壯士挽銀河。騰峯浴鐵朝乘障。下瀨樓船夜戢戈。翡翠越裳近消息。麒麟漢閣遠嵯峨。婆婆橫吹驚楊柳。曄曄商聲響薜蘿。隱豹文韜須霧澤。荒鷄舞困耳漁簑。欣聞幕府收才彥。佇立衡門聽凱歌。療海一作精衛。

荏馬行

荏馬出滇西。青金護鑿蹄。朝驂過歸鴈。夕駕軼昆鷄。蹀雪工升甌。陵雲欲舞梯。流星迸石齒。訝道火龍飛。葵鏡吟贈右溪

花卉中有唐婆鏡者。一名羞天花。一名倒垂蓮。本草所謂鬼白也。其花背日。與蜀葵正相反。曾聞其名。今始見之。托諸聲詩。以寄同慨。

蜀葵與唐鏡。同節復爭鮮。蜀葵終向日。唐鏡每羞天。卉木異情性。造化均陶甄。安得指佞草。重植堯階前。烟丸歌贈製墨毛道士羽周

鷄足烟丸古松心。龍眠惜之如惜金。玄霜遙分玉兔窟。碧髓近挺青蛉岑。茅犀截角光自照。栢麝却臍香太侵。鴻崖羽人故多幻。鶴馭明朝那可尋。莫辭爲我斲霞襟。蘇易簡云。鷄足山古松心製墨絕佳。碧髓青蛉岑見江淹賦。

征人早行圖

杜鵑花下杜鵑啼。烏臼樹頭烏臼栖。不待鳴鷄度關去。夢中征馬尙聞嘶。

後緩聲歌

澤藏之山必有陸沉之波。物或反其常。君將奈之何。雌驍難爲雄。斧小不勝柯。心之憂矣。歌且訛。復思入淮之箭。必有飛海之鱗。披枝且害。心繁實多。隕條吐珠。誰不含。曼睩能無招。心之憂矣。歌且謠。

羅甸吟

直蘭方號鬼。貴竹甸名羅。牛涔枉稱海。峻坂猶題坡。林餘楚筆輅。棧識漢牂牁。久戍勞行側。天高奈若何。笠澤寺三解爲潘參藩父壽

蜀城東望笠澤雲。輪困搖曳青氤氳。萬里從龍持獻君。將獻君。先過里。攢鳳笙。歌燕喜。五津東下仙舟輕。三泖涼波秋水平。景丁南極中宵明。中宵明。玄景煥。展國容。拜家宴。鶯湖小雪梅照天。鱸羹蓴鼓酒如泉。錦袍起舞白華篇。白華篇。丹桂曲。祝千齡。綏百祿。

鶯郎行

苾澤鶯郎啞鵲鴨。驚飛鶯鶯逐鴨鴨。翠袖啼春幽鳳奩。紅絲穿露空鸞桺。碧眼胡兒亂馳鴟。三五紅顏片時老。今日盈盈濱海花。明旦蕭蕭陸涼草。

青海引

長白山前吟黑風。桔槔火照甘泉紅。五千貂錦血邊草。單于夜帳移湟中。華林酒艷長庚醉。沉香春濃海棠睡。金馬門如萬里遙。那知青海城頭事。

田家喜晴謠